

## UNE SOLUZION E SARES ...

*Siôr Diretôr,*

*ti scrîf par spiegâti se vâl la pene o no di pratindi une Facoltât Autonime di Midisine in Friûl.*

*Nol è trop che si à let sui gjornâi cumunicâz di chel e di chelatri e, in particolâr, des sociis sindacâls dai Miedis dal Ospedâl di Udin e, ultimamentri, ancje da part dal Ordin dai Miedis de Province di Udin cuintri no dome de convenzion ma ancje cuintre de Facoltât di Midisine.*

*La Facoltât Autonime di Midisine in Friûl le à domandade in 130.000 furlans firmant la leç 301 dal 11.8.1976, la Senblèe dai Cristians in giugn dal '77, il Consei Provinciâl, il Consei Comunâl, il Censis, il Cunitât pe Univiersitât e vie. Pussibul mo che dute cheste int a setin duc' maucs o ch'â vuelin la lune tal poç?*

*Chêi che cumò a son cuintre seti de convenzion seti de Facoltât a tirin fûr la solite solfe che in Italie and'è masse miedis e cussì a crodevin di stropâ la bocje cu la najne dal «reequilibrio territoriale di studi medici nella Regione». In Italie, a disin lôr, and'è masse che si dan in note in Midisine (32.744 inscriz dome dal '75) e alore, vino di fâ diventâ la robe ancjmò plui grivie zontânt unâtre Facoltât a di chês ch'â sclopin?*

*Resonant cussì, però, o varessin di sierâ dutis lis scuelis, tacant de resonerie ai mestris, cence flevelâ dai professôrs di letaris e di lenghis o dai avocaz. Parcè si tirie fûr il cantin dome pai Miedis? Alore sierin par cuindis agns dutis lis scuelis «dal Regno».*

*La domande e jè un'âtre: il Friûl ajal o no ajal dirit di vê miedis furlans? Pal moment plui di un tierc dai miedis ch'â lavorin in Friûl a son vignadiz. Entri dis agn o varin une sglavinade di miedis triestins tes nestris Unitâz Sanitariis Locâls e i miedis furlans a saran cuatri gjaz.*

*Chel ch'al dinèe ai furlans di vê une so univiersitât autonime al acete cence nissun scrupul che i miedis triestins, dutune cui bassarûi, a invadin come scussions la colonie furlane e in plui ur dà une man ai satrapos triestins ch'â voressin disponi sicu parons espotics di dut ce ch'al riguarde la salût in dute la Regjon, scjafoant sul nassi un dai diriz di fonde dal nestri popul.*

*No vin di lassâsi svuarbâ dai profetis bausârs ch'â cirin di contânus chê dal ors o ch'â vegnin fûr cun statistiche fatis daûr che ur tornave cont a lôr o ai lor santui. S'â è vere che tai Stâz Unîz la proporzion miedi-sitadin e jè di un a 650, in Gjermanie di 1 a 482 e in*

*Italie di 1 a 428, no àn mai palesât che in Friûl o sin 1 a 660 e a Triest 1 a 250 (vadì in Friûl and'è scjarsetât e a Triest bondanse); nissun nol à dit che lis structuris de Facoltât di Triest a son vieris, cun pôs inpresc' e un disordin di int ch'â cjale. E nancje no àn dit che tune Facoltât di Midisine che ûl passâ par serie, il numar normâl par cors al è di 100 (e no di 600 par cors come a Triest), pa la cuâl dôs facoltâz di Midisine in Regjon a saressin juste juste il minim par butâ fûr 200 miedis ad an, ch'al è il numar che nus va ben a nô. Cence fevelâ, po', de serietât de preparazion no dome a nivel talian, ch'ò sin malut, ma a nivel di Europe, ch'ò sin cunfinanz e ch'al è sinpri ce vuadagnâ.*

*Insome, Toni, chî nond'è resons teologjchis o morâls: dome intares par sot e zûcs di partîz par scjafojâ ancjmò une volte un popul ch'al continue a fidâsi di chêi che lu frein par ordin, cun tune costanze che ur fâs ancje onôr, magari par ledrôs. Mandi.*

*Casatta Mario Davit  
miedi tal Ospedal di Udin*

Chî nol è nuje ce zontâ, che tu às dit dut. Se mai o pues dîti, Mario, che il mâl al è tal mani. E mi spiegî. Al è dibant che il Cumitât pe Universitât Furlane al minaci di votâ cuintri dai partîz che àn tradît il Friûl, DC e PCI in teste, se podopo, cuanch'al rive il moment, al tâs. **Cussì al è un scandul che il president de Filologjche al veti ancjmò coragjo di mostra la ghigne in public dopo che si è astignût sul vôt pe Univiersitât.** Tal nestri câs, no podìn pratindi che la int e capissi chestis robis, cun tantis ch'and'â pal cjâf, se un cert Luciano Floramo, inconpetent come me in cont di ospedâl (il so al è un puest pulitic), si permet di vendi l'ospedâl ai triestîns cuanche duc' e àn votât cuintri de svendite. O ch'al è bulo o che chêatris a son môi di suste. **Scomençait, pal moment, a cjapâ su firmis par PARA' FÛR FLORAMO,** ch'al à un concet di democrassie che, venti-jù tai siei ajars, si clamile mafie. Fin che no rivais a parâlu fûr, o vareis i nemîs in cjase, cun grant danp di dut il Friûl.

Març 1979

Pre Antoni Beline